



GOLF LO BIRA PA ARUBA UN MERCADO TURISTICO FUERTE



ORANJESTAD(AAN): Sun Development a plania e cancha di Golf, cu e strategia cu lo tuma tempo prome cu e proyecto aki cuminsa opera 100 % ,pero unavez cu esaki ta na nivel. Aruba ta bay haya e turista cu placa.

Ultimo añanan Aruba a conose un fluho di turistanan, cu ta cay den e categoria Low Budget y esaki no ta beneficia Aruba.

Ministro Tico Croes a bisa bon cla, cu Aruba mester bay concentra su mes riba e turistanan cu placa.

Awor cu e cancha di Golf di Tierra del Sol ta cla, e cantidad di turistanan ta aumentando dia pa dia, aunque cu e Low Season tin su efectonan ainda, pero durante e lunanan venidero esaki sigur lo bay cambia.

Hotelnan ta haya turistanan cu no sa cu tin un cancha di Golf na Aruba, pero tur esnan cu a bay pa tanto hunga Golf o pa bishita e cancha, ta regresa na nan hotel cu palabranan di elogio so.

Segun Raymond Maduro, di Sun Development, den e corto tempo cu e cancha di Golf a habri, awe ya caba nan por bisa cu nan ta operando e cancha cu ganashi.

Esaki sigur ta bon noticia pasobra un proyecto di un magnitud asina, normalmente ta tuma por lo menos 1 pa dos aña prome cu e por cuminsa haya ganashi.

E expertonan cu ta traha na e cancha di Golf di Tierra del Sol, señor Mike Meehan y Rudy Brown, ta bisa cu e cancha ta completamente cla pa hunga Golf den tur su skinanan.

Señor Mike Meehan kende ta responsabel pa tur cos cu tin di haber cu e condicion y mantencion di e cancha, a bisa cu nan mester a traha duro pa logra e cancha di Golf, pero awe Tierra del Sol tin un cancha di Golf di calidad mundial y profesional.

Rudy Brown kende ta un profesional di Golf, ta bisa cu e clientenan mester costumbra ainda cu Golf ta un

deporte social y cu e hungadornan mester tene cuenta cu otro.

Por medio di bon guia di Rudy Brown y e staf di Tierra del Sol, e clientenan ta worde conseha con pa hunga riba e cancha.

Golf no ta un wega cu simplemente ta core subi e cancha y cuminsa dal bala.

Segun Rudy Brown esnan cu no sa kico ta Golf, mester tuma les y unavez cu nan haci tal, nan mes ta bin ripara cu Golf ta un sorto di deporte cu por worde compara cu arte.

Golf por worde hunga pa pret pero tambe pa competi cu otro.

Ta e cliente mes ta dicidi ki direccion e kier bay, pero

esaki semper mester worde haci bao di bon guia y esaki ta loke e staff di Tierra del Sol ta traha duro pe, pa logra cu tur hende por keda satisfecho pa loke nan ta pagando.

Pronto Tierra del Sol lo tin su di 10.000 bishitante y pa un tempo corto asina esaki ta un logro grandi.

Rond mundo tin mas o menos 44 miyon deportista cu ta practica e deporte Golf, si Aruba por haya solamente un porciento di e 44 miyon aki anto esaki kiermen cu ta 440.000 turista extra ta bin Aruba.

Turistanan cu ta hunga Golf ta hendenan cu tin placa, pasobra Golf ta un deporte caro y ta net e tipo di

turistanan aki Aruba mester di dje.

E campaña di promocion cu a worde haci internacionalmente, lo bay duna su efectonan den e lunanan di Oktober pa Februari.

Mas y mas hende local tambe ta cuminsa hunga Golf y segun Tierra del Sol su expertonan, e cantidad di golfistanan local a pasa e cantidad di 100 caba.

Debi cu e cancha di Golf di Tierra del Sol ta un cancha habri pa publico, e atraccion turistico aki lo bay duna su frutanan den e sector turistico.

High Season lo bay muestra e balor gandi cu e cancha di Golf di Tierra del Sol tin pa Aruba su turismo.